

四庫全書

集部

欽定四庫全書

集部

龜巢稿卷十六

詳校官監察御史臣劉湄

中書臣劉源溥覆勘

總校官知縣臣楊懋珩

校對官主事臣陳文樞

膳錄監生臣張元愷

欽定四庫全書

龜巢稿卷十六

元 謝應芳 撰

詩

雪巢為馬仲良賦

馬鞍山高數千尺考槃之阿環大澤梅花為屋雪為巢
窓戶玲瓏空虛白諸公衮衮登雲梯若人奚獨能幽棲
澹然素志絕華藻要令朴俗還標枝監闢策馬官遠謫
居延牧羝羶盡嚙何如雪飲樂巢居更與党家風味別

梨雲無夢清如許。膝上兒郎賦冰柱。此生此樂慎勿移。
聽取龜巢老人語。

次韻答許西溪

憶昔送別黃花秋。烏紗破帽霜滿頭。別來作詩屢問訊。
夢中載酒時遨遊。兵戈同歷二十載。鵲鷗夜啼雲靄靄。
全家老稚幸逃生。又閱桑田變滄海。啓榮之樂今有餘。
勿謂比榮年不如。峴山一望三太息。襄陽耆舊晨星踈。

次韻自述

百年有限耻求仙數口無饑賴薄田
菰米熟來連日雨菊花開到小春
天方從易外窮義畫無復詩中泥
鄭箋客至酒盃時一舉開籠放鶴
舞蹁跹

送婁主簿赴京考績

吳霜如雪點征衣匹馬之京小隸
隨鸞棘特書良史筆鳳臺重覽謫
仙詩天開景運榮文治年少多才
際盛時
野老送行無贐物梅花折去牘前
枝

寄張以誠二首

入城一度一相尋為愛論詩識趣深
歲晏杜門寒不出
折梅要寄隴頭今

二

蘭陵市上湏囂塵藥杵聲中樂隱淪
兒輩荷鋤今日去
一株添種杏林春

雪舟棹歌

并序

湖南潘公珍仲自號雪舟以耆父之年監稅江陰
縣洪武戊辰冬赴京考績語予曰今將告老于朝

得旨則扁舟載雪而歸矣雪舟之興蓋與山陰王子猷有不同耳吁昔者陸公紀官滿鬱林歸舟載石使當日苞苴有物則奚用是石為哉公之雪舟意蓋如此若夫鵠夷子皮之舟裝江南重寶復竊取傾國之尤物隨之污蟻五湖遺臭千古其視吾載石與雪者不翅霄壤今雪舟之歸雖未可必然其志趣高潔如此雖在市朝亦必為清白吏是亦不歸之歸也予嘉之故為作雪舟棹歌三章以道其樂

云

載雪兮孤舟帆江風兮中流蘭槐歸兮無恙吾將老兮

滄洲

再歌

剖肉兮藏珠抱玉兮求沽悵斯人兮非吾徒尋鷗盟兮

侶樵蘓

三歌

舟搖搖兮江水長五老玉立兮遙相望解吾纓兮濯湖

湘樂吾之樂兮未渠央

送王主簿赴京考績

三年一技此鸞棘一息萬里方鵬程
長安西日舉頭近匹馬北風行色清
朝廷考績垂令典臺閣交薦蜚英聲
隣封野老頭雪白也折梅花作送行

雪巖詩為江陰李縣丞作

瞻彼雪巖太行之陰玉樹瓊林纖滓弗侵
雪巖峩峩巖有薜蘿有美君子居巖之阿
峩峩雪巖蔚蘿如昔時止

時行不泥其跡雪白而清巖靜而深曷其似之君子之
君子之心始終一節謂予不信如彼巖雪

寄希物先楚蘭江二禪老

優鉢花開五百年連枝香徹九重天恩承雨露移金刹
語帶煙霞漱玉泉虎踞龍蟠多古迹燕來鴻去又新年
老夫嬾著遊山屐空仰崔嵬夕照邊

過烈塘祖墳里人牧牛于壠上以詩呈郡邑

鳳橋之西烈塘東我祖我禰馬鬣封向來松柏蟠蒼龍

灰飛煙滅邱前風十年天造開鴻濛恩沾萬國生育同
壘頭萌蘖春蒙茸藤枝棘花雜青紅牛羊斧斤集如蠱
一年一度一掃空白頭遺孤抱哀恫麾之不去欺龍鍾
無階上天訴天翁吞聲躑躅淚滿胸府公賴有渤海龔
琴堂長貳明且聰令行如風偃蒿蓬樵夫牧人乃絕踪
將來宰木蔽幽宮九原感戴恩無窮嗚呼九原感戴恩
無窮

懷成都監倉趙執中三首

擲去任公舊釣竿
龍墀拜命即之官
丈夫志在功名外
蜀道行來自不難

二

七千里外芙蓉城
四五月間鶡鴒聲
月俸支來賸沽酒
莫遣閑愁取次生

三

公餘訪古碧雞祠
官柳野梅皆可詩
我欲見詩知雅興
如何黃耳到家遲

寄熊元修

五湖三泖一臞仙，心骨俱清地更偏。
睡鴨燒香書屋裏，閑鷗結社釣磯邊。
絕憐芳草無塵土，又喜黃楊閱閏年。
熟客不來清晝永，南山相對兩悠然。

晚香亭為蔣公勉作

維莫之秋百草不芳，惟菊有華晚節之香。
君子擬之金玉，其相顯顯。印印氣凌風霜，
回視春葩綺羅靚妝及茲涼秋，掃跡窮荒。
菊也特立澹乎坤裳，我佩爾紉我帶爾。

纓厥德之馨匪食其英亭有三徑里猶柴桑亭亦有池
永同南陽宜爾父子眉壽無康矧有佳客駱廬王揚高
堂起居階庭趨蹌玩物適意其樂洋洋鄙人作歌以侑
稱觴

題龔景良傍梅書屋

南昌山水非不佳卜隣直欲傍梅花花開歲晚香滿屋
清致不減林逋家三間茅宇大如斗四壁圖書雜蚪蚪
腹笥便便不自多汗竹之編長在手有時門外雪三尺

羣籟無聲人絕跡
梅花立雪似游揚
不作桃紅憔悴色
春風滿面笑相看
知我鐵心同歲寒
他日移居玉堂署
應有品題稱二難
洛陽牡丹春比屋
日夜沉酣沸綠竹
何當聆我讀書聲
亦若聞韶解忘肉

次韻谷毛雲莊并簡太希先生

吾聞天台之山冠東南
蔚有清氣非雲嵐
山高一萬八千丈
石頭毛髮青
參參鍾靈仙
釋踵相接求為世用疇
能堪不知三綱九法是何物
浪說千巖萬壑能窮探雲

莊先生隱君子非仙非釋棲苔龕胸中冰滿壺頭上雪
一簪羲皇以來書盡讀熟官不要詩仍湛草堂侶有北
山鶴菊泉飲比南陽潭清風日掃三徑竹寒霜歲熟千
頭柑齊名子陳子不愛功名酣坐談風月只松塵卧遊
山澤非挑騖老夫恨臂不羽翼翩然飛去時相叅四壁
同馬卿一禪如阮咸猶喜盤飧菜有二十七生世年踰
八十三忘機頗覺白生室造道尚欲青於藍向來行路
如棘澁今乃茹荼猶薺甘小山老叢挂滄江倚枯枿愛

君傑作神氣壯瞻我孤陋顏色慚蘭陵府主蓮幕客皆
云此詩壓倒方雲菴赤手鯨牙力可拔薰人雞舌香微
含餘波及我老孤研清入肺腑蠲焚悵一朝怪事出幕
府口不忍語非三緘令威到家兮能自談

常郡經歷鄭履元禮吾友天台陳太希之門人
到任數月家人至而元禮病疫而歿寡妻稚子
遑遑無歸予作二詩以哀挽之

盲風歛起怪禽呼吹折琅玕樹一株何事天公渾不管

生年多賦道旁樗

二

琅玕樹折鳳巢傾
膽落鸛雛抱母鳴
故國欲歸雙羽弱
哀哀啼作杜鵑聲

延陵野老歌送張太守

延陵野老巾滿霜
送侯入朝歌道傍
歌中不解說循良
但云三載安農桑
官無煩苛歲豐穰
饑有菽粟寒衣裳
我侯興學扶綱常
授經諸生踵陳襄
一鼓士氣弛而張

劍井亦復騰輝光
訟庭春來莎草長
風行四邑方泱泱
九重天語星使將
五馬夜趣天官裝
黎明馬出金斗坊
羣氓猶挽青絲韁
銓衡郡才進巖廊
將見列郡皆龔黃
連步拾級登廟廊
佩鳴珎璜謹趨跼
掖垣紫薇花自香
甘棠之愛民弗忘
大江東流青海洋
我思悠悠未渠央

寄呂教諭覓惠山泉

木屐上山老無力
茶鐺覓泉猶累人
目光直射九龍角
胸次欲浣三斛塵
水符分竹果如約
石牀焦桐堪作薪

君當知我鄙肉食一瓢不厭平生貧

寄袁子英

橫山東望崑山遠江水西來海水連每辱手書論著述
猶如面晤奉周旋微陽喜復飛葭管大有重書汗竹編
若問老夫兒女事曾孫又抱小春前

謝余提學摘藁序

虛譽何人說草玄雄文為我冠蒲編諸公共美金聲擲
兒輩爭誇石刻傳翦畧小團陽美月餅封新汲惠山泉

故鄉風土殊蕭瑟聊作梅花寄海邊

挽吳母曹氏

賢母無復見孤兒痛奈何絳紗空幔在彤史闕文多林
竹冬猶筍屢氓巷不歌塞予妻若子垂涕憶委佗

代王尚綱挽吳母

澗山湖上避兵時總角曾聞阿母慈霜野不教兒子出
冰池竟得鯉魚知生前冠冕升堂拜死後芬芳婦德碑
愧我不才俱靡及抽毫遙寫楚些悲

次韻賈教授暮春言懷

琴有徽音劍有光惜哉江海老張蒼且將濁酒供瓢飲
何必明珠用斗量壇杏作花紅樹暖泮芹抽葉翠波香
鰲山邈在天東北時復瞻雲首一昂

寄萊陽縣丞蘇偉正

觸熱訪而翁萊陽書適至而翁釋離憂吾儕慰馳系青
雲發軔初甘雨隨車沛旱歲竟豐穰天恩更汪濊屢氓
九衢舞海市百靈喜慰然英妙年際此太平世蹇予八

十翁懷人二千里哦松公務餘食檠珍珠比魏公百韻
詩仕學有遺軌

錢孝女詩

斷臂耻受污矧目示守節斷髮割耳鼻亦截忍棄夫家
甘毀滅吁嗟錢氏女孝心亦如之矧肉於股療阿婆想
當持刀入手時精誠默感天翁知百靈撫呼走神醫肉
乃化作藥石糜搜除淋液腹除癖如以湯泉澆雪釋婆
無呻吟女弗戚隣翁里媪皆嘆息予生慕忠孝老去仍

惓惓每見返哺烏如甫拜杜鵑願言屏鴟鴞不與同戴
天竹林寒筍冰池鯉澤中堇菜籬根米天其垂恩錫孝
子董狐盡為書青史

和江陰鄭教諭登樓

為愛君山好每登樓上頭一壇渾不冷有酒更何愁歲
月江流急人生泡影浮興來歌舞罷倚檻看天不

次韻答陳推官

珍重新詩遺華於翠織成披雲天似洗連日雨頻傾大

府羣英聚清朝列爵榮正湏康濟力膏澤被蒼生

和陳推官過余公祠

公諱闕字庭心元進士安慶路總管守城死洪武初

勅建元忠臣廟謚忠宣公

砥柱迴瀾屹呂梁安知誰武復誰湯六年守戰孤臣死
一代文章萬丈光草木荒城威肅肅丹青遺廟貌揚揚
悲歌沃酌知何日北斗持來挹酒漿

殷孝伯輓詞

憶昔羈旅中片言識駿蔑十載忘年交兵戈正騷屑

閏

知子早卓越春秋參五傳窮源見澄徹

閱

維時陵谷變遵養卧巖穴洪武更

化初鋒車聘高潔辭勞忤當路一命萬里徹志違烏鳥
養淚忍啼鵲血咸陽火方燼教雨沃餘烈與輪周孔廟
駿奔豆邊設庭生書帶草青青比蘭茁孤雲日在望縮
地恨無訣端歸一覲省亟去兩踰月老夫獲晤語清風
濯煩熱著述亦已多討論心愈切安知三疊歌竟作千
古別招魂賴遺孤魂歸母垂絕於乎世之人賦命何優

劣或厭飫八珍子獨茹冰雪或穩步康莊子獨蹊阡隄
行行止於斯矩步踵先哲崑山雲氣慘婁江水聲咽誰
為有道碑修名罔磨滅

哭盧知州

諱熊字
公武

束帛三徵出薜蘿雲堦步武正逶迤飄風動地須臾靜
奈爾琅玕遽折何

二

雪手灘流理繭絲一襟華藻竟何施秋風夜月華亭鶴

又作悲聲似昔時

送浦良能之安陸府代父從軍

秋風涼秋夜長往哉讀父書超然出戎行詩書元帥古
來有縉紳先生今汝望

寄徐伯樞縣丞

逐客多焚晝錦衣謫仙喜得夜郎歸古來白雪詞難和
此去青山志不違洗馬池邊楊柳暗卧龍岡上豆苗肥
獨憐揀萼秋蕭瑟又見西風旅鴈飛

某巢居病瘧有客自青門山來者語予曰賢太
守過道鄉佳城以弔以酌且為之扶植仆碑添
土舊封又將築周垣而護之殘山剩水皆有德
色某聞之喜不覺其疾頓愈起坐午窓老硯濡
墨筆是詩以記盛事洪武十年歲在丁巳七月
十日也

世有文潞公乃立明道表明道表不立斯文尚幽眇時
有孔北海乃稱通德門通德門不稱大儒曷推尊古人

今人同此心當風正欲披其襟嗟予巢家子騶子傳道
龍門天下士一朝扣天關獨立批龍鱗祇恐綠衣黃裳
悞人主安知炎煙瘴雨危其身萬里投荒挺霜竹歸來
青山竟埋玉迄今二百九十年陵谷幾番經變遷折角
麒麟卧荆棘復見薄侯駐熊軾鬣封添得烏銜土頽碑
扶起龜趺石先生九京知不知名在人間益輝赫孔北
海文潞公今人古人將無同青天高高不可問白楊為
我叫西風

題夜潮圖

昔余夜醉錢塘酒看潮八月中秋後銀山湧出海門來
潮聲殷若雷霆吼此圖之作知幾年當時景物皆依然
雲山兩岸淡籠月雪浪一江高拍天一觀頓覺毛髮立
再觀祇恐衣裳濕扁舟漁子任掀舞別渚鷗鳬自翔集
奔騰澎湃無足驚人間平地風波生乘桴尼父果浮海
從遊我亦跨長鯨

郭府判惠佛面竹杖蓋以佛狀而名之矧夫節

有交互之異旁生兩枝末復為一視他杖殊不同詩以謝之

頎然此君生越棠化身無乃是空王生來文六紫金相
復現太乙青藜光孫枝並出比能秀老節交錯成文章
只恐化龍飛入海尚煩垂念瞽偃偃

呈府官求刊思賢錄

忠公神遊白玉京鳳凰無復朝陽鳴寥寥二百九十載
其文況忍成漂零某也束髮頗嗜學四方擬拾手不停

珠聯璧合綴方冊字字句句含芳馨向來避地東入海
挾書幾落長平坑還家暗投科斗壁何異寶劍埋豐城
郡公宣化重名教斯文要俾晦復明顛呼鐵筆寫堅木
彷彿中郎鐫石經螢窓雪案人快覩妙語炳如懸日星
顯忠不須庵忠鄒無用亭牽裾伏蒲想儀型儼然見我
鄉先生

題徐良夫耕漁軒

我本耕漁人喜子與同志子居中吳山水窟比我延陵

更佳致太湖三萬六千頃七十二峰連紫翠山皆可畊
水可漁無復紛紜嬰世累朋游日接慎威儀酣酒賦詩
時適意客來遺我金蘭集儼然承顏依玉立因以今人
思古人與客評論重於邑輟耕莘野赴阿衡後人嘒嘒
疑割烹擲去漁竿佐周武鷹揚之勞亦良苦當今盛時
伊呂多幽棲正宜安薜蘿山中小草或浪出千慮鮮能
無一失願言養高持素心百鍊不改堅如金相過未擬
聆楚音寄言時復相規箴

生日口號

餘生重作太平民
雪色綾袍皂葛巾
兒業經鉏能養志
家居瓢飲不憂貧
屋頭箇箇慈烏喜
堦下翩翩舞鶴馴
此日誰為湯餅客
孟光相對髻如銀

二

秋菊春蘭各有時
頽然老我一書癡
脚跟不識青雲路
頭髮空成白雪絲
怕醉有時曾止酒
遣閑無日不吟詩
傍人若問今年幾
八十年前五歲兒

送聰上人

蘇州有即常州有今雨來時舊雨來
鏤限門前人立雪
寶華堂上鼓鳴雷
九州禹貢包時橘
十里吳王醉處梅
請與淡翁論古意
老夫朝暮亦浮杯

送僧歸四明省母

同根華萼兩三枝
甘輒能供老阿嬈
不用睦州蒲織履
睦州因得賦歸遲

二

吳霜如雪滿袈裟
正月闌珊可到家
別有一般清淨供
高堂設法向摩耶

送鄭教諭進表之京

東壇鬢舍跨征鞍
奉表朝家慶履端
虎拜三呼稱萬壽
龍顏一笑宴千官
酌來天上葡萄酒
洗去胸中苜蓿盤
官樣文章新製作
老夫刮目待歸看

過天寧寺閱行中和尚澹居稿知其邃於易學
兼長於詩故寄此

西來祖業繼箕裘旁入儒林託泳游二雅什中歌矩度
九師注外易源流松堪受記皆摩頂石解知音亦點頭
逸興飄飄誰足擬白雲飛度楚江秋

次韻陳推官元旦作

東風楊柳驛橋邊香雪沽來斗十千早飲屠蘇懷舊俗
遙瞻閭闔賀新年萬方人樂昇平世五色雲開咫尺天
廊廟器成今未晚著鞭姑讓祖生先

正月十四日代簡招鄉中親友

上元之前日將午相邀諸公集環堵山瓢持作鸚鵡杯
畦蔬擷取龍根脯兩兒肅客衣襜褕老夫鶴立梅花擔
照天蠟燭夜有月勿謂寒舍無燈相棄嫌

寄管伯齡兼簡陶呈甫

前年詩寫心聲去今日人來口信通一自初交經世變
兩無相笑坐文窮崑山冰柱軒窗外笠澤煙波賦詠中
更憶南隣龍頂竹曾留東走鹿皮翁

張伯仁兄弟濠梁蒙恩還鄉

客行二月初三日詩到千墩寄二難且喜江南春氣早
不聞濠上雨聲寒花時多釀醅釀酒芳館重修芍藥欄
往事真成塞翁馬正須招集笑相看

簡伯仁里中親友七人

臨濠人歸去年夏故園花開今兩春看花把酒應共樂
訪竹題詩毋厭頻紅塵車馬跡不到滄洲魚鳥人相親
老夫遙望德星聚乘興幾回車欲巾

聞趙朋南免官還家作此代簡并以孝女傳求

詩兼寄毛世延熊元修

水村先生冰雪姿一襟清氣溢為詩不同不異頗奇崛
步趨李白仍委蛇夜郎歸來脫塵屐濯足淞江太湖水
雞壇有盟知弗渝書或浮沉况杭葦衰年萬事皆遺忘
咏歌之樂殊未央請觀側陋出純孝援筆為揚蘭蕙芳
毛公世業詩三百白華補亡求必獲更煩溫社語閑叟
定有隋珠照方冊

舊冬十二月初四日次子林赴京初九日入覲

十三日授開封新鄭縣學教諭即日之任時雨雪連數日寒甚眷焉于懷久而不釋

兒別雙親到日邊承恩徑著遠遊鞭一千里外汴梁路
十二月中冰雪天揚震未期堂有鱸鄭虔何愧坐無羶
只今偃武修文日正欲鸞膠續斷絃

服霞道人歌

服霞道人本仙骨隱居琴川山水窟朝看鼎食暮鼎烹
富貴於人果何物道人忘世味祇服山中霞却青精棄

胡麻八珍視同泥與沙扶桑飛出金老鴉氤氲五色搏
精華响噓呼吸間入腹皆河車手持九霞觴頭戴三朶
花松風為作洞仙曲絕勝金谷鳴箏琶一經不學乃無
術麻姑送酒徒爾誇吾服吾霞吾自足安知世有萬羊
祿夷齊餓死良可憐留得清名傳汗竹秦人採藥尋蓬
山好兒好女無復還漢宮空設盛露盤銅仙為之淚汎
瀾元霜本非霜絳雪亦非雪請從服霞道人逍遙指點
空同授真訣

貽五牧劉永真

昔賢五牧家何在今爾幽棲地甚偏
種秫每供彭澤酒煮茶時汲惠山泉
錦鳩呼婦雨初歇丹杏作花春正妍
堪笑老夫頭似雪興來尋戴過前川

雲牧詩為楊同知賦

廬陵美山川穹林古喬木雲樞三千年
遵養卑自牧靜言求放心雞犬常在目
竭來陟雲衢半剝剖符竹牧民如牧羊
四郊春草綠草豐羊茁壯亦有飽眠犢
豈無敗

羣者其藩或輕觸約之鞭用蒲所履繼前躅致身將青
雲岳牧聯佩玉佐主牧天下庶類賴蕃育雲牧懋厥功
吾言此芹曝

王叔明雲峰圖

王郎多學畫最工筆法似舅松雪翁松雪之書妙天下
以書為畫妙亦同想當灑墨成雲峰豪氣壓倒陳元龍
層巔翠律摩蒼穹咫尺可論千萬重嵐光翠滴天無風
若有微籟鳴杉松於乎此時此畫復誰有我為此甥懷

此舅

秋林讀書圖

春風不著長安鞭
秋林讀書年復年
百篇蝌蚪自為寶
三足蟾蜍誰與憐
目光爛爛走金電
口角泠泠飛玉泉
老我東家兔園冊
尚分隣燭教曾玄

題村田樂圖

老人村老瓦盆常作雞豚社
不識州縣門阿翁醉倒阿婆
婆笑膝上伊鴉弄乳孫

六月八日得次子書并書久旱高田未秧是夕
連雨三日喜而和之

新鄭書來劍井邊方將陰石捶荆鞭雷霆夜作三更雨
江海寒生六月天不惜空囊沾綠螳從教破屋濕青氈
北窓風響蕭蕭竹如聽南薰奏五絃

去冬送鄭教諭如京詩為天寧聰公沉滯至今
年六月轉託發還故作此并元詩寄鄭

一詩代折送行柳半年竟墮無何鄉祇因沽酒謝不敏

尚謂道術能相忘高堂談經多士集澄江濯纓清晝長
為問襄陽兩者舊歌鳳曾無說楚狂

寄謝楊純夫兼簡陳高士

客來飲客北海樽客去送客東城門不嫌襦襦留信宿
各出肺肝聆語言三日雨救赤地旱百川水作黃河奔
賦詩為別并志喜兼簡太邱賢祖孫

聞袁子英著書作詩寄之

我所思兮耕學翁壯年氣欲吞白虹眼看陵谷一變改

此心乃與寒灰同硯田筆耒耨經史不稼不穡勤於農
我哀民彞失所養錫類且欲來羣蒙共惟元聖筆六籍
為世大法垂無窮揚墨溺人甚洪水孟氏距之成禹功
秦以申商漢黃老六朝接跡論虛空緇黃愈出愈荒誕
冠冕鞠躬趨下風韓歐間生數百載鳳鳴朝陽羣羽從
中間洛閩繼洙泗卓彼二子能折衝雄詞至今凜生氣
宜從孔道追遺蹤東將入海乘朦朧長江大河無遏壅
老夫獨恨雙眼矇不與觀日扶桑東

贈衡隱居

我昔母年垂九十帶經犂鉏粗供給伊今有母八十餘
孝養之聲動鄉邑堂前暎暎忘憂花屋頭翩翩返哺鴉
林宗若識茅季偉薦書定徹天王家

題漁人扳罾圖

大橫峴東芙蓉湖水村高樹屹西株漁郎曳罾坐樹下
短衣緇撮赤髭鬚此圖無乃貌此景東鄰曲舍皆菰蒲
吾嘗過此看春水桃花雨晴春日晡漁郎含笑語厥子

鰕魚肥似淞江鱸街頭米貴魚亦貴賣魚日糶供家餽
只愁水面重租課飛風健卒頻追呼逋租畢輸榜捶脫
前村有酒仍須沽猶勝祿食致奇禍坐受鈇鉞連妻孥
夜來湖上好明月醉吹蘆笛歌嗚嗚人生之樂有如此
此身安用紆青朱漁郎漁郎知我乎我亦烟波老釣徒

溪居垂釣圖

磻溪老父興西周綸竿棄擲鷹揚秋富春先生赴東漢
羊裘幾被朝衣換人生出處各有時如魚飲水魚自知

釣鉤無餌釣清泚若人彷彿元真子好山滿眼青孱顏
清風綠樹滄洲灣悠然意態極瀟灑豈是尋常釣魚者
浮波之龜如出洛漁郎睨之龜弗却賣卜覓錢人正多
七十二鑽將奈何不如且曳泥涂尾相伴幽人弄煙水
細看元在畫圖中多言莫笑癡猷翁

管伯齡惠書并和詩故復次前韻荅

芙蓉湖照橫山影蓬蘺門開曲逕通半載月昏渾不出
一經頭白未能窮論交半是漁樵者訪舊多於夢寐中

說與故人能信不顏然黃鵠化鳬翁

維揚王有恒避亂居東吳三十餘年所至寓舍以
聽雨蓬名之多學能琴而善飲醉則鼓琴自娛故
自號曰醉琴然鄉土之思亦嘗於琴發之予蓋相聞
而未之識也吾友釋仲翔專書為求二詩遂為賦之

聽雨蓬

昔年家住揚州市雨聲不入弦歌耳居吳聽雨三十年
客舍如蓬卧蓬底蓬窓晝暝雲抹漆滴滴點點疎復密

絕似瀟湘夜泊時半雜風波響蕭瑟有時聲急如建瓴
有時珠玉聲琮玕屋山便作拖樓倚兩耳洗來心骨清
心骨之清豈不好一點鄉心忘未了天中玉樹無雙花
夢魂日夜長飛遶只今二十四橋月依舊玉簫聲不絕
一帆風送到瓜洲聽雨孤篷聲又絕

醉琴

張顛草筆常醉揮以頭濡墨愈神奇醉琴之妙亦應爾
穎師乃為徵吾詩琴中佳趣知者誰麴生為我同襟期

千鍾百觚追古聖五音六律洞玄機一襟宇宙春熙熙
七絃冰霜風颼颼得之於心應於手如魚飲水非人知
釣天廣樂醉鄉境悉以所樂鳴金徽高臺自傾池自廢
雍門枉為田文悲我歌醉琴行持贈醉琴叟小春多釀
梅花酒我來與君酌大斗濯足滄波太湖口聽醉琴為
醉友

海革為詢無言講主作

大海多風波浮革蔑根蒂嗟爾海上革似我人間世前

身揚白花幸不墮泥滓
化生江漢間朝宗隨衆水
出沒幾沙劫全此清淨體
所以無住著默契宗乘旨
芥子內須彌吾知同妙理

挽王氏祖母

母在重闈鶴髮垂孫為能吏
鶚書馳二三百里去鄉國
七十五年稱母儀李密陳情
方有表張林紀德未成碑
斗城昨夜西風急吹折護花
帶雨枝

次韻酬陸子文見贈

故鄉不願衣錦歸亦不願入承明廬願言結交天下士
腹有五車今古書還家十年空兩手釣竿之外餘何有
白雲如雪橫滿山蘿屋三間大於斗浪川雙鯉來新吟
詩中意興秋俱清雄豪氣敵劉夢得喜無郊島愁窮聲
嗟哉風雅久不續老我山林成朽木金盤秋露玉壺冰
洗去胸中塵一斛覓官應笑明河篇託物可擬石鼎聯
先生識趣出塵表鞭策後進追前賢東望吳門長太息
舊俗繁華復因襲太湖三萬六千頃七十二峰湖水側

何日攜將麴秀才登臨共醉姑蘇臺眼前一事特可喜
湖山清氣鍾羣才先生屢薦胡不起濯髮滄洲弄煙水
遙遙裔出華亭侯甫里高風更無比只今奕葉多流芳
東床嬌客名尤香呼兒整我遊山屐早晚去從潘孟陽

次韻答集講主二首

欲尋石上三生約姑待梅邊十月春結社東林無奈遠
寄書南鴈豈辭頻平生賴得詩書力朋輩多如骨肉親
元伯九泉呼不起擬將雞黍一沾巾

二

千墩南浦水迴環一棹西風路不難
骭曾於堂上坐綈袍能禦客中寒
可憐學劍身今老祇有耽書興未闌
傳語心知數君子小春來借早梅看

冬至即事

一簾紅日雨初晴客屨駢羅送復迎
賀節本非三代禮隨時且喜一陽生
齊奴金谷財為害揚相冰山勢易傾
何似酒杯長在手青山相對適閑情

冬至前二夕憶次子林不寐枕上賦詩將成忽
其母夢中作聲撼而覺覺而喜言夢林烈塘舊
居作湯餅畢垣居室事懽甚予因用其語為是
詩結句云

去年臘月初九日發軔天階又一期鄭校頗聞衿佩集
歐詞應作送迎詩久無書信來黃耳每有親朋問白眉
阿母夜來曾夢汝甘分仍在舊西枝

送楊純夫歸琴

杜子客長安行囊本枵然得錢沽酒覓鄭虔不嫌官冷
寒無氈爾來六百有餘載世道多隨陵谷改身為今人
心古人清風高誼依然在嗟我如鄭貧蒙君愛如杜雖
無三絕才擣散頗自喜一從傾蓋意相得頭髮不知誰
黑白衝寒觸熱每見過愛我西牕好山色援毫或和龜
巢編解纓或濯龍井泉常言好古絕類我外物多忤中
彌堅低頭甘立矮屋下高論直到羲皇前朝來賣得凌
雲賦麴生車載來相顧門前尺雪凍不消風木吼如號

虎怒宿宿信信傾腹心言欲挈舟抵家去呼兒更酌罄
餘懽贈別殷勤抒情愔我昔居吳十九年君歸煩君訪
諸友吳山醉處好湖山十闕

鄉人來作輓

脚局且對春風開笑口街頭米賤酒亦賤一百青蚨滿
雙斗儘判連日醉如泥百憂盡付無何有人生窮達各
有時阿衡元是扶犁手詩書豈徒守章句言行正須傳
不朽珍重林居慎厥修好音慰我思悠悠

雪蓬為蔡子堅作

鴟夷船載西施去遺臭五湖煙水路喜爾吳淞雪蓬關
江水曾無尤物污蓬牕洞開天雨花拖樓屹立水為柱
鵝鴨不驚柔櫓鳴鷗鳬渾在平沙聚非熊無夢釣無餌
如琴無絃得琴趣虎頭能為畫漁蓑驢背無勞見詩句
潮州阻雪八千里諫書直抗曾何補殘瓊鬻雪十九年
使節堅持亦良苦雪蓬之樂樂於天雖欲同人人弗取
獨有山陰王子猷清興頗堪同日語

過顯慶寺

六載重來釋氏家一甌新啜趙州茶
杏花風後春何冷
柏子庭前日未斜拄杖賴能扶潦倒
闕文煩為補楞伽
要聽說法頻來往且喜平橋路不賒

書潞城樵舍壁

燕子來如舊雨桃花笑為何人竹下青苔不掃恐教鶴
步生塵

二

一室四皆立壁六孫三已歸妻猶喜老萊舌在不妨矮

屋頭低

三

拔木狼無跋
囊絕糧道阻
周流天眼或
開或闔人心
何怨何尤

四

滾東滾西農
晦巷南巷北
人家白雪秋
香禾黍綠雲
春靄桑麻

劉德祥監稅
江州客有誤
傳其子死者
遣人回

家并寄書吾孫辭甚酸苦因賦詩代簡

九江相去二千里一別于今五六年盡道國恩容告老
安知家信有訛傳山連楚尾青天外潮落潯陽夕照邊
遙想此時公務隙爐峰相對思悠然

題趙行素佩韋齋

綵衣翩翩童牝年佩觿佩鞶庭闈前鐵馬紛紛戰爭日
佩犢佩牛江海邊幽蘭紉佩非不好獨醒未欲追前賢
竭來佩韋不佩弦常以輔我氣質偏視韋之緩我之急

如餌良藥沉疴痊世事多因忙後錯緩不及事理亦愆
不疾不徐發中節秉彛庶得全吾天巖廊鳴玉似高步
江妃斛珠人浪傳貪榮可笑蘇季子佩六國印扶危顛
何如茅齋但安坐且有竹風堪醉眠青山於人少知者
白雲與我同悠然韋乎韋乎心自懸得魚吾豈忘吾筌

贈黃仲器

予觀道書謂洞庭山有林屋洞天仲器以避兵居
之既而過雲間適海上復還常之橫林閱歲月三

十年距洞庭三百餘里仍以林屋自號示不忘也
徵予詩故厯叙其遊息之概如此云

一目九州皆戰場避兵林屋水中央林屋仙人不知處
橘井委棄青霞漿木奴包金亦致寇人乃隨雲出巖岫
五湖三泖放孤舟遵海幽尋采三秀堪與再造隔兩塵
故鄉來歸能幾人芙蓉湖上大橫峴煙連綠樹橫林春
解裝付與箕裘子管領春風挑與李幅巾自作逍遙遊
別有行窩修竹裏一童出入長相隨款段之馬亦不騎

林屋別來陵谷移時望白雲猶賦詩膏梁文繡俱不喜
獨曰愛詩心未已堪笑老夫同此心白首論交結知己
何當呼起李謫仙每飲一斗吟百篇殺青盡伐南山竹
剩錄好詩娛暮年

悼許君善

谿西老人山澤癯一生祇以詩為娛常言愛詩入骨髓
好詩抄藏千百紙七言近體尤快作不費工夫細琯削
嘔心每笑李家兒牛鬼蛇神何足奇老夫初焉未相識

數篇不知何處得稠人廣坐誦吾言說項過於楊巨源
一朝傾盖千墩下膠漆相投不相舍西鄰假館兩年春
買宅移家情轉親此時吳門正堅壁張角未死人相食
雲梯砲作霹靂聲狼煙暗天血滿城吾徒幸若王官谷
朝夕同吟紫芝曲桑田變海噓吸間死欲邱首歸橫山
暮雲春樹勞遠憶十載詩筒仍絡繹重來桑梓甚蕭條
巷有索租人叫囂骨冷九原呼不起一酹非歌續蒿里
嗟哉時俗貴輕肥如子愛詩人亦稀

贈王仲昭父子

扁舟入吳空載月閭邱虎邱俱不謁停撓再拜范公祠
揚花正落祠前雪義田義宅三百年義聲洋洋天下傳
嗟爾吳之人胡不踐遺躅貪夫婪婪昧盈縮前車後車
屢顛覆下床雙屨內雙足奚用領軍鞋一屋我來訪舊
無所將贈以范公博施之義方家傳更須授賢郎福澤
將來未渠央吳淞江水長藍謝青母我忘

吳逸庵輓歌辭

廓然一襟涵宇宙鍾氣會稽山水秀春秋高似伏生年
岐伯諸書口傳授浙水西來家屢遷名與杏林俱不朽
老去居吳抱雙膝四顧狼煙暗如漆兒能負米百不憂
有酒即呼人共吃常時隱几看青山醉則勦勦枕琴瑟
廿年同飲淞江水通家之交親戚比別來恨無縮地術
時復論心書一紙只今祇與阿戎談翁在九京呼不起

李明善慈竹軒

吳淞江南湓浦曲慈竹軒開薜蘿屋更無花木鬪芬華

一徑波光照猗叢纖塵不滓蒼玉叢枝枝葉葉皆清風
一年一度冬夏笋冬生其外夏其中德哉此竹美如許
子母相交禦寒暑嗟哉人為萬物靈溫清幾人能如汝
吾知吾友此軒居朝夕奉親來版輿母慈子孝默相契
更喜君子能威如樹萱堂上分甘樂諸孫錦裯如錦籜
家僮笑指青琅玕少長喜與俱平安令名千古垂不刊
咄彼鵠梟兒人面刀劍腹不學返哺烏頑然忘顧復鳴
呼吾不知其見此烏兮何面目爾何日兮視吾竹

簡湯道原曹子壽

予生頗好古恐兒輩不能繼述敢請二賢良相與
語之吾兒觸屏煩為警省旦夕稍閑煮茶專待

要學劉伶死便埋隨行負鍾欠輿臺螢生腐草光能幾
螳在南柯夢易回一笑豫言身後事兩賢聊共掌中杯
貧居何處堪鋪席流水窗前好綠苔

過橫山龍祠作

橫山龍母祠前路人說今年祭龍苦前期邑有皂衣來

督遣丁夫剪榛楛里胥中有豪家郎搜攫如鷹闚如虎
編氓一呼六十人棄擲犁鉏行或沮十家之甲最可憐
背血淋漓遭捶楚囊無一錢供百需肥腴豚如買烏牯
手傾麥斛比珠斛剜肉成瘡誰為補胥常大嚼過屠門
今乃閭閻剖驚股吾聞此語三歎息郡邑安知弊如許
祠官稽古垂令典穆穆緝熙由聖主聖心寬仁重民食
三年兩度蠲租賦天生感孚和氣洽曰暘而暘雨而雨
報功於龍歲有祭禮若迎猫恩更溥龍兮龍兮知不知

如此嗟來食應吐

皇恩蠲租詩

洪武庚申天下秋糧欽蒙全免今年壬戌秋糧夏
稅又皆免徵征繇聖恩寬大亘古無比故耕稼之
民歌謠滿野而某則併以區區所聞者書之

漢紀蠲租半遷書汗竹奇大哉今聖主全以惠羣黎量
與乾坤合恩同雨露垂豐年魚有夢丹詔鳳重施庶富
民生遂敦寬俗習移微眊皆鼓腹窮士亦揚眉往制成

均法新頒釋奠儀雅音諧律呂名教浹華夷茅茹今朝
拔英髦靡一遺八荒仁壽域萬世太平基水有清河日
山無爛石時時雍民皞皞年耄我蚩蚩不作輸芒蟹真
成曳尾龜倚牆歌此曲擊壤付吾兒

林在新鄭縣學六月公文來取其子塏視疾七
月初四日塏言別而行付家信外寫此

一聞汝有河魚疾三宿心如野馬馳遠阻恨無人縮地
吉占賴有卜言龜眇生稠漆黏雙眼身兀枯株坐有胝

預寫蓋棺遺囑去好傳經業佐明時

送沈居仁同塏往新鄭

二千里外視吾兒重九日前期汝歸坐卧待看黃菊綻
往來相伴白雲飛郵亭歇處加食飯客路涼時早裊衣
無限老懷言不盡臨岐目送思依依

賀袁一泉陳大方新任道紀司官

山中宰相古來有地上仙官今更清夜半光生雙劍出
秋高氣感九鐘鳴丹霄拱極星辰近黃道經天日月明

玄牝書中多妙理政須獻納佐隆平

賀聰聞極正心印新任僧綱司官

象法提維付偉人聖皇綸綍命諄諄手持正印天龍護
身著方袍雨露新旭日斗城衙有鼓清時渴浦鏡無塵
牆東病叟頭如雪也喜曇華並得春

贈天寧寺無學長老

報恩扶起法幢來鐘鼓天寧講席開道出語言文字外
卓然聲價自崔嵬

二

麻衣疏屨古人風
儷葉駢花一掃空
八萬四千修月手
斧斤隨入象王宮

賀府官重修多稼亭

朝家重下蠲租詔
郡圃聿修多稼亭
一帶金湯增氣概
四郊禾黍勝丹青
甘棠風作婆娑舞
橫峴雲開翡翠屏
斤斧聲中勸農意
爾農豐樂正須聽

周節婦詩呈府縣官

潏湖水出白鶴溪大江潮來溪口西江潮湖水接連處
節婦姓陳周氏妻良人早世舅姑沒抱雛日夜號空閨
盡拈奩具易喪具衣有淚血髮無筭績麻絡絲紡具織
破牕夜雨風淒淒孤燈照影伴寂寂寒風夜雨聲酸嘶
煙塵遠避東入海兒方長大能鉏犁時清歸守舊桑梓
布荆蕭瑟茅茨低青絲兩髻變蒼雪皎如玉樹無纖翳
前年縣官帖鄉里覈實上府文可稽老夫近聽路傍語
聖皇德與唐虞齊天語諄諄為天下求賢悉上青雲梯

閭閻未見旌表節門前草沒青苔蹊願言宣聖化郡邑
罔俾側陋薰蕕迷旌善亭中名一題恩同璽書封紫泥
佇看俗習接武皆磨蹄

再贈衡志通

世俗以甘旨奉養者為孝溫清定省之禮鮮能之
今寒區衡氏兄弟三人皆善養其母其伯兄志通
禮意之勤老而彌篤冬月則以身溫被席雖大風
雪母不知寒能此一事可配古人能勿美乎故作

此續前所贈詩以補其闕云

雞鳴雪屋起居安
魚出冰池食飲懽
最喜兒能溫被席
慈闈冬盡不知寒

寄馬馱沙陳糧長

老龜獨巢蓮葉秋
元龍高居百尺樓
長江只隔衣帶水
佳景宛在蓬萊邱
一年時序換新厯
四海弟兄懷舊遊
竹君寫我歲寒意
聊作梅花寄隴頭

送曹德昇赴批驗茶引所

山無猛獸水無蛟邑里春來樂意饒部集茶商新茗籠
壚添酒市古溪橋赤心報國年方妙黃耳還家路不遙
珍重清時用刀筆平陽遺澤正寥寥

謝新鄭縣官助葬亡子并以志略送去轉縣學
去年孟秋初天旱火雲熱吾孫奔父喪病眼淚流血陸
行二千里跣踵若跛驚歸來秋盡時黃埃滿線經詢言
父襄事從頭為予說一衾覆黥婁家人影單子喪具百
無措宿儲瓶亦竭幸逢賢縣令賄贈意切切擇木製美

棺飭匠夜不輟僚寮同哀傷祭奠豐且潔青青諸佩衿
感化重禮節是猶風偃草宏綱賴提挈吾知賢令心高
誼等前哲無錢及元振有則與同列無麥及堯夫有則
與同轍悲哉我中子忝教兩期月眷言古東里圖經自
來缺編蒲載前言辛苦磨硯鐵草創十八九放筆成永
別手澤存於家歲久恐亡滅抄書送琴堂公餘賜披閱
韞櫝皮囊舍無為醬豢設會有作家手織錦為補綴姓
名蠅附驥九泉應感悅矧知埋葬恩寧無報銜結老夫

懷謝言縮地恨無訣殘喘苟朝暮烏能見駿茂坐馳仰
崧高心聲吐鳴咽

述懷

雙眸半瞎耳全聾年及新豐折臂翁孤陋一生棲白屋
虛靈方寸炯青銅人如禽犢真堪耻家有詩書未是窮
但願太平田野樂九原高卧聽松風

人日和前韻二首

曾聞社酒可治聾桮榼分來謝里翁鈍士常磨龜硯石

貴人多佩虎符銅人前出語羞稱好杯後為文錯送窮
連日昏昏如病域不知春到棟花風

二

林居鶴髮老癡聾彷彿忘機海上翁留客但沽隣舍酒
鑄錢安用蜀山銅一年春色花無幾千古川流水不窮
誰謂東家錦衣樹龍頭顛卧夜來風

寄南澗海革二講主

東土西天今幾華南能北秀本同家門前弟子齊腰雪

案上經文五色霞袖拂古墩行傍柳餅分春水坐煎茶
遙憐丈室俱清絕屢夢幽尋適興賒

寄張仲安舅甥及邵濟民許叔遠

去年艤棹千墩浦澆酒伯倫墳上土伯兮伯兮呼不醒
仲也憂予仍眼青最喜諸甥多似舅戀戀之情無不厚
東陵瓜地兼種藥杏林仙人與同樂箕山之瓢今貯詩
雞林賈人知不知老夫別來八九月憂患無端髻添雪
負米不歸悲仲子我益又鼓酸風起傷春不欲向人言

恐人忍聽哀號猿最苦雙眸失岩電近日看書渾不見
兀如枯禪壁常面隙有微明潜且眩阿兒呼來滌塵硯
代筆題詩簡羣彥

無錫華景章以牆東陸先生所序乃祖玉溪義
士之文徵予詩故有此作

猗歟古聖賢飢溺視由已聖賢久不作人多飢溺死天
歷年中歲薦飢老夫身親耳自知操壺枕藉委溝壑烏
鳶飽食狐狸肥適逢郡縣無良吏狎弄文移等兒戲義

倉和糶百蠹生殊失先民救荒意吁嗟玉溪翁高義孰
與儔默教之粥活鄉里立解倒懸危急救指困不結當
世交易量不效前人尤盡令菜色作喜色如度弱水登
蓬邱嗟哉玉溪翁往事誰紀述鄉人口碑傳四方牆東
老手春秋筆老夫知名五十載更喜牆東文字在義聲
洋洋流至今又閱桑田變滄海天生孝孫念厥祖禮樂
趨蹌繩祖武丈夫不憂無萬鍾要為顛崖救辛苦

唐君舉挽辭

早年讀律如五經案頭夜照練囊螢學成能展四方志
當路縉紳俱眼青神州赤縣坐蓮幕贊畫雖勞意磅礴
青雲拾級步步徐腰纏不跨揚州鶴邯鄲夢斷楊花春
桑田變海宇宙新歸來東陵剪荆棘故侯誰識瓜田人
竹林小院差可喜為箕為裘奉甘旨青松宅邊紅稻畦
白雲亭上烏皮几四時花木手自栽客來看花常置醴
有時寂無語蒲團醉逃禪有時曳鳩杖朗誦逍遙篇得
鹿門龐公之安比濟南伏生之年生平有如此死去真悠

然薤露歌或可鐫此歌便作碑銘傳

過無錫口占

客舟無錫道中歸聽唱吳歌淚濕衣
泰伯墓田耕穀餽
偃王祠廟走伊威
二三策在遺芳遠
千百年來舊俗非
詩寄瓢齋老詞伯
吟邊同為一獻欵

題漁樵共話圖

爾樵斫青山爾漁釣滄洲
世事百不聞此心兩悠悠
道傍弛擔渚泊舟促膝面語何綢繆
想論會稽人衣錦或

訝桐江棄羊裘人生窮達各有分曷不嗒然自作逍遙遊

贈醫士錢伯祥

杏林老仙山澤臞幅巾逍遙曳長裾逢人善作青白眼
有子能受岐黃書酒對玉峰傾鑿落丹成金鼎養芙蓉
焦桐掛壁斷絃久藥杵聲中樂有餘

題扇

青山滿眼氣蕭森茅屋人家煙樹林客星多擲漁竿去

誰復扁舟釣碧潯

題子昂竹石圖

玉堂歸來髻欲絲
漚波亭中清晝時
竹君石丈意相得
不時為作無聲詩

安安道人歌

僧坊旅宿崑山縣
夜讀安安道人傳
似將秦鏡作斯文
道人肝膽都能見
早年學劍欲有為
車塵馬足曾驅馳
蕉隍夢斷竟失鹿
對田乃耕東海涯
安知逃名逃未得

射兮旌招論觀德諸生遊藝集如雲儼如風詠從曾哲
歸來自喜安其安一室視同天地寬鹿門龐公與同志
妻子不知行路難傍人問我安心訣非佛非仙非臆說
纖雲不滓沉寂天水湛霜潭照秋月家居四壁莓苔青
柴門雖設晝亦扃年來豈獨樂吾樂堪輿俯仰俱清寧
有時得錢即沽酒明月清風作三友胸澆磊塊去即休
不學淳于論石斗嗟我碌碌者和爾婆娑歌無勞赤松
遊只在青山窩挂瓢樹下舞婆娑歌聲繚繞青銅柯羣

雄自奏卷白波安居之樂奈爾何

遠綠亭為惠聚寺瑞芝年作

道人愛山常目接無復經繙貝多葉碧天低處見絕頂
蒼石爛來知幾劫清風一掃六合塵須彌芥子等法身
諦觀有色若無色大地盡作曇華春

宿崑山延福菴

葉舟來訪漁樵社蘭若適逢龍象羣屋近玉山多潤色
林藏寶地絕塵紛玄壇坐到三更月高枕眠分半榻雲

鐘鼓聲中鳴殷若老夫堪笑耳無聞

題崑山縣城主簿先塋圖

舊家衣冠麟角族陰陰榆柳連鄉曲佳城父祖馬鬣封
鬱鬱松楸在吾目養親弗及奉庭闈居官豈敢懷蕨薇
二十時中公務畢三千里外歸心飛出言不作雌黃口
臨事不為高下手琴堂喜得佐絃歌俸米支來供俎豆
高懷炯如寒露壺連步陟彼青雲衢兩塋銜土集義烏
更遣丹青添畫圖

題竹枝雀圖

覆車之粟衆喧呼爾獨忘飢入畫圖
枳棘叢邊林有竹一枝何異鳳棲梧

題玉峰書舍圖為俞彥智作

婁江水接東海洋崑山玉立摩穹蒼
江山城邑美如畫之子卜宅山之陽
邯鄲夢斷歸來後詩三百篇長在手
尚將古疏補蟲魚復以今文校蝌蚪
門前小溪流水清畧約不通車馬行
漁童甕汲供茗盃鷗沙席坐尋詩盟

才多轉覺讀書好
春雨庭生書帶草
時稱狂客醉鄉遊
罔俾四明專賀老

題畫魚圖

魚在在藻或在淵
隨波泳遊同一天
會得莊生濠上意
畫圖詩史總難傳

題畫竹顧挺之子作

父作子述為竹傳
神筆意古澹靈犀
絕塵品題者誰龜
巢老人

題雪竹圖

此君立雪清復清老夫見之雙眼明琅玕恐折驚棲鳳
三嘯虎頭風欲生

絕句二首寫延福山中客況寄止菴長老

一榻清風偶借眠白雲長遶枕頭邊客來題遍芭蕉葉
我亦留詩謝老禪

二

風幡交動曙光搖蔬筍分甘到客寮最喜松聲秋瑟瑟

月餘忘肉似聞韶

一般春

希夷古高士詩言一般春以詩謚攸居夫豈尋常人一
般春意何在莊生論天倪託物肆迂怪列子說混沌其
言極夸大老夫請以理折衷慎勿謂我胡公之中庸古
今先後無始終洪纖高下俱流通芸芸萬物生意遂盡
盡兩間和氣充鶯鶯燕燕妙歌舞花花草草紛青紅孤
松或落幽澗底三秀多生冀壤中步伸尺蠖天運轉戶

啓百蟄雷音同鶴長鳬短頸分一敢以私意窺神工一
般春意如此朱絃嶧桐奏流水洋洋自入知音耳小車
高閣卻堯夫隨柳傍花程伯子針芥相投肝膽合祇應
纔到東風裏白雲先生知不知同姓乃有此白眉老夫
宿昔愛此詩四百餘載人無之頭髮雪白雙眼眇也來
摸索珊瑚枝

風波詞

家住橫山古澗阿孰知平地有風波一壺為濟中流急

可奈無金報爾何

洪武十六年夏五余寓崑山延福菴蒙李無逸
冒雨見訪且邀午酌以尋二十年交好之盟席
中聞余茂本通政談玉峰志鏤版無逸能力為
之高義可喜別後作此詩以贊其美并致謝意
云

老夫著書雪盈顛秃筆掃盡松煤煙書成無人為傳刻
明珠暗投三十年玉峰有志今雕鐫公乃下榻邀羣賢

魯魚亥豕盡滌濯銀鈎鐵畫森戈鋌婁江風物靡不載
一邑快覩人爭先知公高風雅量振頽俗令名當與傳
澱山湖邊五畝宅芙蓉錦城耕稼田多情念我久離別
風雨遠來書畫舫開樽竹館話夙昔屋角雨聲飛瀑泉
爛烹鵝肉軟炊黍特憐老齒令相便草堂之資送杜甫
遙知破屋窺青天別來東望澱山月再盈再虧今復絃
鵝雛出穴皆五色門牆桃李春俱妍無由縮地更攜手
寄詩并送思賢編

自挽 洪武六年九月作

齷齪龜巢翁飄蕭烏角巾干戈二十載辛爾全其身平
生得三樂此去棄六親青山為我宅白雲為我隣寄聲
謝相知毋勞為酸辛

二

生為無用人死作無名鬼生死天地間區區等螻蟻商
人自忍饑楚人從赴水長鏡付兒曹持以字妻子將來
事無涯且免閔吾耳

挽張溝南

故人家住江之陰江城草堂花竹深
蚺杯喜作真率飲鳳管不殊韶濩音
中郎有女可傳業萬事不復縈吾心
於乎一歌兮一悽愴白璧如今空黃壤

故人墓在君山下黃絹碑辭更親寫
風流不減賀知章軒昂有如嵇叔夜
秋風蕭瑟宿草青過客知名多下馬
於乎再歌兮再思之誰能為我追騎箕

故人生來天骨奇抱才不試清名垂
山陰道士寶遺墨

雞林賈人傳舊詩寒家夜夜屋梁月顏色宛然前別時
於乎三歌兮三太息歌聲未斷還相憶

次韻答子才去秋見寄

子才名朴上海縣石浦人

懷哉博物張茂先淞江太湖煙水連舊藏篇翰合雙壁
新發光焰驚四筵鞠華不濕重陽雨汗竹應書大有年
教子一經還自讀林居幽趣相依然

感年

咄彼新豐折臂翁偷生年與我相同世無兵革真難遇

家有經鋤未是窮兒子冷官成覆水老妻春夢逐飄風
獨憐未畢全歸願兩目昏盲耳更聾

天有眼

風波起平地胥溺無可援荆棘生大塗跬步不得前清
朝赫赫嚴紀律污吏貪婪弄刀筆翻雲覆雨妙若神白
日青天暗如漆天有眼視必明何忍覩此世人之不平
轟雷尚擊黨碑碎炎霜豈不飛闌局惜哉延陵好州邑
叫囂之聲雜號泣龔黃卓魯幾時來解我閭閻倒懸急

天有耳

腹中或有劍對面難隄防笑中或藏刀轉頭多中傷人
形獸心險莫測擠人火坑猶下石東隣西舍苦牽連爺
娘妻子多狼藉天有耳聽必聰何忍聞此世人之不公
恢恢天網或汝漏百靈未必皆癡聾嗟哉尼父無復見
冶長非罪誰能辯况有讒夫口爍金將謂盖高天聽遠
寄野居處士

春風有花隨處看不勞快馬走長安春山有藥皆可采

何用樓船渡東海老生常談人所忽門巷蕭條青草沒
野居隱者獨知言乃曰與我心同然垂簾丹室清如水
賣卜君平絕相似得錢沽酒常滿壺談笑樂與親朋俱
金谷飛蚊暫時聚靜遠何如野居趣匣藏三尺古吳鉤
幸無蛟龍驚斗牛焦桐絃絕挂空壁洗心只用床頭易
忘年之交三十春與我義同雷與陳千墩別來耳目疾
兀如朽株門不出六經家業愧無傳教兒只讀原道篇
有懷欲得語同志東飛恨不生雙翅牛鬼蛇神雖孔多

青天白日奈人何
願言正已斥邪說
始終一念堅如鐵
寸膏欲澄千丈渾
厥功有無宜莫論

和任義甫重陽絕句三首

西風拂我菊花筵
霜落蒲萄酒瓮前
弓勁馬肥煙瘴歇
雲南將士正開邊

二

題糕醉筆吐天花
風景蕭條興亦嘉
多少玉門關外客
故鄉一望一咨嗟

三

休官陶令果何聊不赴江州太守招
天上無人能送酒
浮雲空作白衣飄

九日志喜

黃花無雨笑相看青女初霜未覺寒
天下編氓增負版
雲南征士解歸鞍市沽斗酒錢三百
隣送杯羹物九盤
最喜叫囂聲不到來朝雞犬得平安

題松溪釣魚圖

看花不躍長安馬濯髮滄洲結鷗社千巖萬壑一絲風
豈是尋常釣漁者月滿舡水滿川月在水中光不濕人
於舡上坐青天魚乎魚乎自悠然只今吾亦忘吾筌

林大菴主真公往宜興參宏辨禪師回途跌傷
其膝卧疾久之作此問訊

石頭路上悟玄機跌破泥丸一笑歸從此不須盤膝坐
卧看來往白雲飛

天界藏主銘祖心歸常州府護國院信至龜巢

作此代簡

偶著青鞋出薜蘿
竟參白足坐盤陀
龍蟠虎踞江山好
燕去鴻來歲月多
言別石城歸舊隱
笑將塲鏡為重磨
松枝東長煙霞喜
我亦滄洲舞釣蓑

題高士觀松圖

賢哉陶元亮
休官撫孤松
之人坐松陰
高興將無同
楚煙霞裾澹然
冰雪容安知
洛陽道車馬
正憧憧

尹泰春玉峰舊隱圖

春風夢破邯鄲枕三徑歸來掃白雲藏壁家書還自讀
排衙縣鼓不相聞內交林壑蒼髯叟比德冰霜抱節君
熟客不來心似水滿庭空醉落紛紛

王仲昭挽歌詞

千墩之陰湓浦曲鬱鬱葱葱煙樹綠五陵豪氣適消亡
此地人稱小金谷中有琅玕玉一株枝葉扶疎鸞鳳宿
鵲鷗夜飛枝上啼九頭血污玲瓏玉飛廉怒從天上來
東走扶桑西若木掃除妖物靡孑遺玉株亦拔移荒服

八千里外雲南地煙瘴偏方魑魅俗道經七譯路幽險
澤有神龍惡薰觸洪浪掀天霹靂飛幾作湘纍葬魚腹
丹旆歸來窳鄉土華屋高邱生死足縲麻痛泣桑梓悲
淚痕多似湘江竹嗟我東西南北人愛爾瑰奇曾刮目
鄉無旦評勿為少令名在我思賢錄嗚呼青山紅塔道
鄉墳誰復相期薦秋菊

贈醫師張有成

嗟哉延陵古城郭舊家喬木秋蕭索先生眉壽氣如春

借問平居果何樂笑言吾樂得於天燕饗不勞鐘鼓作
一從無夢見周公青箱五經束高閣便便老腹只醫書
頗學挂壺人賣藥藥囊得錢儘沽酒兒舞斑衣我杯勺
有時出郭看青山手策筇枝曳芒屨揚子江頭太湖口
晞髮滄洲吟杜若歸來一曲焦尾桐今古閑愁總忘却
老夫喜開心與同以言相贈仍相約東門之東劍井西
蘿屋數椽雲一壑肯為尋山數見過樵飲漁歌良不惡
人生百年能有幾但看花開與花落世傳仙人上天騎

白鶴荒唐繆悠言不忤請從先生持筆削

崑山辛彬甫元夕前旅次岑寂作詩懷之

魯魚一洗版圖編徑著麻鞋送上天七里八岡風雨夜
誰家燈火對愁眠

贈呂克明

馬鞍之山玉嶙峋氣所鍾者德潤身古人已矣不可遇
今人多躡青雲去中有一人冰雪姿青雲垂翅歸故枝
老夫識面三四載但見才華發光彩去年訪舊山水鄉

乃聞孝行非尋常兢兢持身親所喜為親不惜殘肢體
親存盡歡喪盡哀哀號淚濕三年縗嗟哉天質美如彼
移家恨不居同里歸來細與吾兒說檢身自謂誰優劣
繇駒處齊齊善歌東瞻玉峰奈遠何

寄耕學袁先生

新歲又人日故人無嗣音數詩曾倡和半載孰浮沉笠
澤鷗盟在蕉隍鹿夢尋吾今洗吾耳聽此絕絃琴

自和感年

前韻

軒軒黃鶴化鳬翁老態如今變亦同幾度出門遭鬼笑
一生徒壁坐詩窮掃松先壠清明日抗葦官河舫舫風
春怨忍聞啼蜀魄傍人為我喜癡聾

逸菴詩

代膠山徐伯樞作

士學而仕猶力於農三時服勤乃逸於冬當勤之時以
稼以穡鹵莽滅裂施報弗忒未勞而逸君子所憎勞而
不逸君子不能於昭令典致仕有期一日必葺罔敢或
隨時之至矣銜恩遄歸逸子而菴亦孔而宜其容舒遲

其行逶迤含哺鼓腹樂乎雍熙莊曰大塊逸我以老是
用作歌以為頌禱

清澹子詩

世味尚醲郁清澹獨有水寡慾養吾心汪汪亦如彼
頤良可羞菜根有餘美凡為君子交當知肉食鄙

題趙典史家藏聰聞極所畫水仙

有人宴坐風泉室水仙之花照佛日冰鷗滌硯為傳神
不著纖塵浣清質山礬是弟梅是兄涪翁品題非過情

紅蓮幙靜薄書暇時一覽觀心眼明

題松菴圖

吾聞張子房漢家初封萬戶侯便從赤松方外遊又聞
陶隱居華陽高住三層樓尚愛松風聽不休從遊松子
或假託請聽松聲真可樂古人今人同此心老去棲遲
必巖壑白髮左司諫赤心天子知君恩養老他日歸光
州草木增光輝今觀畫史貌清致想像為作松菴詩青
山崔嵬青松離奇三間薜蘿屋四壁莓苔衣前榮燕雀

來賀喜中林猿鶴還相依山中服食何所有松根茯苓
大如斗松拂輕於白玉麈松醪香似黃封酒座有嘉賓
樽不空每日共澆談笑口不言不笑默相契平生久要
蒼髯叟向來百卉腴且衰偃蹇不受冰雪欺尼山聖者
無復起歲寒後凋誰品題春風牡丹洛陽市華屋金盤
鬪奢靡車馬遊觀人如蟻但說姚家之黃魏家紫那知
松菴之清樂如此

送任義甫之京

放却滄洲老釣竿送將圖籍上長安朝霞爛爛日初出
熱客紛紛路未乾七里八岡鳩杖去三山二水鳳臺看
薰風解愠今猶古舞袖歸來語所歡

辛彬甫自京城回過東洲田舍極言曾覲天顏
之喜舉酒送別詩以和之

一百十戶一版圖兩三箇月兩赴都親承天語拜闕下
喜得風帆歸海隅到家且聽華亭鶴斫鱠旋買松江鱸
鄉人為作軟脚局衆樂不妨如大酺

悼護國院昇東谷和尚

憶昔桑田變海時
法幢扶起歲仍饑
諸方乞食供緇侶
十載開堂響白槌
香火石龕師子像
紗籠塵壁老夫詩
客來今雨重留宿
誰向東園折露葵

六月初一日亡室初度感愴而作

白髮三千丈
齊眉六十年
今朝煮湯餅
爨婢亦潸然
六月望自潞城回
東洲書目前二事
以示親知
庶聞者或有省焉

緹縈贖父謁天子
聶嫫痛弟哭屍死
親親義重不顧身
千載流芳著青史
今人豈無骨肉親
冷眼視同行路人
朝家旌善作亭子
誘我薄俗令還淳
吾詩相勸匪相訐
不信汝曹之心真是鐵

次韻錢彥學見寄

頻年歸計果何如
九龍之山駒谷虛
山中流泉若有語
遲子續修鴻漸書

二

三十年來山上山詩名流落五湖間歸尋鋤斧南泉老
壠有白雲相伴閒

三

萍水相逢記昔年馬鞍山下屢周旋羊裘不脫漁竿老
彷彿嚴光也自賢

四

一榜三魁我舊都如今文盛說中吳詩窮不用論郊島
風雅揚揚有大涂

五

梁谿如鏡照羣峰勝地生才淑氣鍾想像鶻冠人未老
金莖露洗玉芙蓉

六

桑柘東風叫伯勞犁鉏南畝課兒曹一枝樂與鷓鴣並
阿閣那知有鳳巢

七

春秋九十明年是禮樂三千風志衰訪戴未能移剡棹

和陶猶欲繼坡詩

題天葩雲液軒

識馬不須論牝牡相人但欲知賢否我愛天葩雲液軒
中人賢在一真無矯揉戴星出入公務勞退食從容樂
詩酒紫毫之筆吐天葩得意如看長安花白螺之杯瀉
雲液破悶絕勝陽羨茶謫仙九京不復作一篇斗酒誰
共樂藍田哦松人亦好座無杜康殊落寞我詩我酒興
不孤風月溪山皆畫圖胸中磊塊盡澆去方寸炯如水

一壺愚聞孔公醉決事勝人醒孔公何人哉希之即齊
名斯言請為座右銘酒德有頌政有聲詩聲更作韶鈞
鳴

壽任義甫

十月初十日

曾看滄海變桑田又歷黃楊厄閏年抱膝面山西牖下
科頭背日午簷前中郎有女能傳業僕射無兒不怨天
八十春秋雙足健鄉人喚作地行仙

次韻彭知縣以公事如宜興過太湖作

百川水溢東流急天風捲雲如捲席雄鳩呼雌鼓晴翼
且喜人無雨霑疾官舡掛帆出湖去乘風破浪無衝激
舟人笑指一足烏烏也玲嶼退飛鷁山無猛獸水無蛟
陽羨往來人絡繹蓬牕拄笏看青山佳句屢成忘盱食
令乎令乎匪遊逸聊為湖山窮眼力渴湖飛渡不崇朝
東滙沙湖又深入彼疆此界犬牙地概用朝家律三尺
人言行路古來難範我馳驅自無失星言勒移署掾筆
分我餘光照隣壁

懷吳中衡心友

老去多蒙故舊憐客來喜得信音傳書能教子醫傳業
居欲依仁宅屢遷赤米白鹽瀕海地青萍綠綺博山煙
曾聞靈素多曾注好擬詩家作鄭箋

代簡張子才

遐想張梨谷相望吳野居馬鞍長在望魚尺久無書七
日陽來復三年月閏餘芸邊生意動君子喜何如

王有恒秋初貽書約回過訪尋假館之盟故作

此於丁堰姜氏逌之

舊雨魚來今復來故人懷抱亦佳哉黃楊樹厄三年閏
緹室葭飛六管灰文有焰光皆李杜情如膠漆即陳雷
燈花有約鷗盟在莫負柴門掃綠苔



龜巢稿卷十六